

Von de Micke

Dess Kättche unn ihrn Schorsch unn moi Fraa unn ich, mir hawwe bei uns uff de Terrass gesotze, hawwe Kaffee gedrunke unn Kuche gesse unn hawwe zwischedorsch alls in de scheene blaue Himmel geguckt. Sächt uff oomol de Schorsch: Jetz wars Oofong de Woch e bissi kühler unn schunn sinnse fort, allminonner sinnse fort.

Ei wer dann?, hott moi Fraa gefroocht.

Ei die Schwalwe. Unn aach die Micke, hott de Schorsch ze Antwort gewwe.

Ja die Micke, habb ich gesaat, die warn bei dem warme Wedder gonz schlimm.

So e Mick iss schunn lüssdisch, sächt de Schorsch, weil als ich omm vorsche Freidaachmiddaach uff de Couch gelehe habb, iss merr alls oo im Gesicht erum gemacht. Ich konnt mett de Händ wedele wie ich wollt, die iss nit fort bis ich se gefonge hadd. In moiner Faust hottse alls erumgebrummt.

Ess Kättche sächt: Ess iss so. Merr moont so e Mick det grad nor e Gesicht unn e Par Ärm kenne unn weider nix von de gonz Stubb.

Onnerst als die Schwalwe, habb ich gesaat, die mache weit eweck. Unn obwohl die Junge von dene noch nie in Afrika gewese sinn, finne die de Weech dorthie von gonz alloo, die hawwe enn oigebaute Navi.

De Schorsch hott genickt. Ich habb gelese, die erbe dess schunn im Ei, die brauche später nor noch flieche ze lerne.

Ich habb gegrinst. So e Erbgut hawwe mir Mensche aach, dess hawwe mir von de Neandertaler. Doo kimmt dess her dass unser Mädcher so vill babbele unn mir Männer außem Wald erausfinne, wenn merr uns verlaafe hawwe.

Moi Fraa kennt moi Sprüch, awwers Kättche war e bissi sauer unn sächt: Wo solle mir dann dess Babbele unn ihr dess Hoomfinne her hawwe?

Ich habb noch mehr gegrinst. Ihr, also ihr Fraue im Neandertal, habbt in de groß Höhl gesotze, habbts Feier nit ausgehe losse, habbt die Kinner onn de Brust gehabt unn habbt mett onnern Weiwer de gonz Daach nor geschwätzt. Unn wenn mir Männer so emm Mammut hinnenooch sinn unn dess erleecht hadde, mussde mir joo widder zu de Höhl zurückfinne unn dess bei Nacht unn Newwel. Ja, unn dess hott sich in die Menscheköpp oigegrawe unn doodefoo zehrn ihr unn mir noch heit.

De Schorsch hott merr zugestimmt. Dess mettem Hoomfinne stimmt bei uns aach unn dess mettem Babbele genauso. Glaab merrs, Honnes, doo kennt ich grad verrickt werrn, doo sitze die Mädcher drei Stund beisomme unn wenn merr dann Gude gesacht hawwe unn schunn uff de Gass sinn, dann fonge se grad widder oo ze babbele unn heern erst uff, wenn unserooner enn Schrei loslässt.

Dess iss halt dess Erbgut, habb ich gesaat, awwer saach emol, was hosden eichtlich mett dere Mick gemacht, die in doiner Faust gebrummt hott?

Ei, sächt de Schorsch, ich hadd moin gude Daach, bin uff die Terrass, habb die Faust uffgemacht unn habb se flieche losse.

Unn, hott die Fraa de Schorsch gefroocht, iss die Mick zurick uff doi Couch kumme?

Naa, sächt de Schorsch, die iss nimmi kumme.

Ich habb gemoont: Die hott halt nit dess Erbgut von de Neandertaler-Micke, die hott de Weech nit zurückgefenne.

De Schorsch hott gelacht. Nit desweeche. Ich habb gleich hinner ihr die Terrassedier zugemacht. Eiern Honnes